

Kastam rampas dadah RM18 juta

30 Januari 2018

Kastam rampas dadah RM18 juta

SARINAH MAT KASIM

NILAI - Jabatan Kastam Diraja Malaysia berjaya menumpaskan sindiket pengedaran dadah seberat 880 kilogram dengan nilai kira-kira RM18 juta, Jumaat lalu.

Ketua Pengarah Kastam, Datuk Seri T Subromaniam berkata, hasil maklumat orang awam, sepasukan anggotanya membuat serbuan jam 11.30 malam di sebuah premis di Kajang, Selangor.

Menurutnya, operasi itu telah membawa kepada penahanan 14 lelaki dan tiga wanita warganegara Indonesia, sedang memunggah guni putih dari dua kontena ke dalam premis, yang disyaki sebagai stor penyimpanan.

"Hasil soal siasat, anggota penguat kuasa berjaya menjumpai 37 guni putih dipercayai berisi dadah berbahaya dalam kontena yang dikirar sebagai garam dari Pakistan.

"Daripada jumlah tersebut, enam guni itu disyaki mengandungi dadah jenis ketamin, dengan be-



Subromaniam (dua, kanan) menunjukkan rampasan dadah pada sidang media, semalam.

rat kasar 114 kilogram, manakala 31 guni lagi mengandungi serbuk putih kristal disyaki dadah heroin seberat 766 kilogram.

"Semua jumlah yang dirampas itu bernilai kira-kira RM18 juta, dan ini adalah tangkapan terbesar pada tahun ini," katanya pada sidang me-

dia, di sini, semalam.

Menurutnya, hasil siasatan awal kontena berisi 1,885 guni garam itu datang dari Pakistan dan berlabuh di

INFO

- Berat dadah 880 kilogram
- Tangkapan terbesar tahun ini

Pelabuhan Klang, sebelum seludup masuk guni yang mengandungi dadah ke Malaysia.

Katanya, semua suspek yang ditahan terdiri daripada warga asing dari Indonesia, Myanmar dan Pakistan.

"Orang Yang Disyaki (OYDS) itu kemudiannya ditahan reman tujuh hari bermula 27 Januari untuk membantu siasatan.

"Kami tidak menolak kemungkinan ada penglibatan warga tempatan dalam sindiket tersebut," katanya.

Subromaniam berkata, modus operandi sindiket itu adalah dengan meletakkan setiap guni dadah seberat 25 kilogram itu bersama 1,885 guni garam bagi mengaburi mata pihak berkuasa.